

Begić Mustafa, dipl. pravnik i geod. inž.



U Sarajevu su 26.01.2022. godine porodica, kolege i prijatelji primile jako tužnu i žalosnu vijest. Dugogodišnji direktor Uprave za geodetske poslove Bosne i Hercegovine i dugogodišnji predsjednik Saveza udruženja građana geodetske struke u Bosni i Hercegovini, Mustafa Begić ih je zauvijek napustio.

Ukopan je u Sarajevu na groblju Vlakovo, 28. januara 2022. godine.

Mustafa Begić je rođen 20.06.1933. godine u naselju Begići koje pripada naseljenom mjestu Jaruške Donje u općini Lukavac.

Završio je Nižu gimnaziju u Tuzli 1950. godine. Nakon završetka Niže gimnazije, upisuje Srednju geodetsku tehničku školu u Sarajevu koju uspješno završava 1954. godine. Nakon završetka srednje škole, zapošljava se u Zavod za geotehnička ispitivanja gdje ostaje do kraja 1954. godine, kada prelazi u Projektanatsko preduzeće „Projekt“ u Sarajevu. Od 1958. radi u Birou za unaprijeđenje poljoprivrede – Poljoprojekt, odakle prelazi na mjesto šefa katastra općine Kupres. Iz općine Kupres 1964. godine prelazi u katastar općine Tuzla na radno mjesto rukovodioca katastra. Iz općine Tuzla prelazi u Republičku geodetsku upravu SRBiH u Sarajevo. Direktor Geodetske uprave Bosne i Hercegovine postaje 1993. godine i na toj funkciji ostaje sve do gašenja te institucije.

Uz rad nastavlja dalje obrazovanje i 1969. godine upisuje Višu geodetsku školu u Sarajevu. Uspješno je završava 1972. godine i stiče zvanje geodetskog inženjera. Završio je i Pravni fakultet Univerziteta u Sarajevu i stekao zvanje diplomiranog pravnika.

U društvenom životu je bio posebno aktivan. Od 1980. do 1988. godine bio je predsjednik Saveza geodetskih inženjera i geometara Bosne i Hercegovine. Od 1995. do 2003. godine je bio predsjednik Saveza udruženja građana geodetske struke Bosne i Hercegovine. Kao predstavnik Bosne i Hercegovine bio je član predsjedništva Saveza geodetskih inženjera i geometara Jugoslavije. Za predan rad u Savezu geodetskih inženjera i geometara Jugoslavije, dodijeljena mu je plaketa zaslužnog člana Saveza geodetskih inženjera i geometara Jugoslavije. Dobitnik je i Povelje Saveza geodetskih inženjera i geometara Bosne i Hercegovine.

Čitav život se predano bavio naučnim radom. Svoje bogato znanje i višedecenijsko praktično iskustvo i rezultate dugotrajnih sistematskih istraživanja, pretočio je u više knjiga i članaka s tematikom imovinsko-pravnih odnosa u Bosni i Hercegovini, od najstarijih vremena do današnjice. Njegovo kapitalno djelo „Zemljovlasnici Bosne“ predstavlja neiscrpan izvor podataka o evidencijama nekretnina Bosne i Hercegovine. Treba istaći i knjigu „Komentar zakona o premjeru i katastru nekretnina“ koja je imala za cilj detaljno pojasniti pojedine odredbe Zakona o premjeru i katastru nekretnina, donesenog 1984. godine. Njegovi članci u časopisima Geodetski glasnik, Pravna misao i Glas arhivara BiH su nepresušni izvori informacija o geodetskim aktivnostima u Bosni i Hercegovini. Zahvaljujući neiscrpnom entuzijazmu kroz svoja djela je sačuvao nemjerljivo vrijedne podatke koji svjedoče o bosanskohercegovačkoj geodetskoj djelatnosti i agrarnim odnosima u našoj zemlji.

Kao spoljni saradnik učestvovao je godinama u nastavnom procesu Odsjeka za geodeziju Građevinskog fakulteta u Sarajevu, gdje je bio zadužen za nastavu iz predmeta Organizacija geodetskih radova i Katastar nekretnina. Nesebično je prenosio svoje ogromno znanje i iskustvo studentima, s osnovnom svrhom da se nastava i rezultati rada u visokom obrazovanju geodeta podignu na što viši nivo.

Bio je dugogodišnji član komisije za državnu granicu Bosne i Hercegovine sa susjednim državama.

Skladan porodični život je proveo sa suprugom Nazilom sa kojom je imao kćerku Melisu i sina Senada.

Zahvaljujući svom ogromnom iskustvu, opširnom znanju i objektivnosti, često je dolazio u žižu javnosti, vezano za aktuelna pitanja koja se tiču vlasništva nad zemljištem, restitucije, denacizalizacije itd.

Smrću Mustafe Begića, geodezija Bosne i Hercegovine je izgubila velikog stručnjaka i entuzijastu koji je svoj životni vijek posvetio razvoju i unaprijeđenju geodezije u našoj zemlji. S pravom se može tvrditi da među imenima koja su ostavila najviše traga na geodetskoj sceni Bosne i Hercegovine jedno od najistaknutijih mjesta pripada Mustafi Begiću. Zahvaljujemo mu za sve što je učinio za našu geodetsku struku, te ćemo, uz dužno poštovanje, sačuvati njegov lik i djelo u trajnom sjećanju.

Jusuf Topoljak i Nedim Tuno